

**REGIONAL NEWS BULLETIN
HEADLINES (EVENING)**

Date – 15/09/2024

Time - 18:30 Hrs

1. CM Pu Lalduhoma chuan tun thla a hawn hman tum sorkar flagship programme ‘Bana Kaih’ hnuai ah Chief Minister Special Scheme a awm dawn thu a sawi.
2. Kumin thla 8 kal ta chhung khan Mizoramah sikserh natna avangin mi 5 an thi tawh a, Lawngtlai district ami vek an ni.
3. Kawng chhiat avangin Tuialhthei phur Tanker te kawng lakah an tangkhang nasa a, Mizorama Filling Station-ah tuialhthei pek chhuah tur a tlem tawh hle
4. Delhi Chief Minister Arvind Kejriwal-a’n ni hnih hnuah Chief Minister a nihna atangin a bang dawn tih a sawi.

<><><>

CM HANDHOLDING

Chief minister Pu Lalduhoma chuan a sorkar flagship programme ‘Bana Kaih’ ruahmanna chu tun thla hian hawn hman an tum thu leh chutah chuan Chief Minister Special Scheme a awm dawn thu a sawi.

Nimina Tourism department hnuai a tour operator pakhat, Evergreen Tours & Travels leh Chungtlang Lo Zawh Organising Committee ten an buatsaih Chungtlang Zau Lo zawh chu Pu Lalduhoma'n a hmanpui a. Chief Minister chuan Chungtlang khua chu thelret ching tam khua an nih thu sawiin kalphung thar mipui sawrkar hian rubber hi a ngaih pawimawh avangin Chief Minister Rubber Missions kalpui tan ni a ti a. An khuaah hian hmalakna tam tak an nei chhoh zel a rinawm thu a sawi a. Hand holding scheme-a Chief Minister Special Scheme hnuai ah hmalakna tur a zira cheng nuai khat thleng dawn theihna tur awm thu sawiin, loan cheng nuai sawmnga thleng puk theihna a awm dawn baw a. Chutah chuan guarantor-ah sawrkar a tang ang a, a thawk thate chu loan laka a pung zawng zawng pawh sorkarin a tumsak baw ang.

Pu Lalduhoma chuan hetiang hmalakna hi India rama kalpui thei awm chhun an ni dawn ni a sawiin, mipui sawrkar an nih ang ngeiin tumah thlei bik nei lovin, a ti tak tak tur an nih phawt chuan kan Handholding Scheme hi an dil thei ang, a ti a. Mizoram hmasawna tura sawrkar ruahmanna sawiin mipuite taihmakna ram, hlawhtlin tuma bei tak tak tamna ram hi ram changkaw leh hmasawn an ni zel a. Chutiang mi te chu a tahtawlin an banah kaiin an khaichhuak dawn a ni a ti a. An hlawhtlin ngei rin thu a sawi a. An sawi tawh thin ang khan thlai thar pali an thlante kha a rate an puan ang khan sawrkar chuan support price a pe dawn a. Tute’n emaw sawi pawr an lo tum a nih pawhin lo lo awih lo tur leh sawrkar chu a dinna ngai ah nghet takin a ding reng a ni tih hre turin a chah a ni.

Chungtlang hi Reiek thlanga awm a ni a. Chhungkaw 100 vel an cheng mek a. An khaw ram tlak lama Tut lui phaiah chhungkaw 80 velin Rubber kung 50,000 chuang an nei mek a, Mizorama Rubber Cluster lian ber niin an insawi. Chhungkaw 70 vel chuan an hnai tan tawh a ni.

<><><>

RODENT ATTACK

Tun hnai khan Zawnuam Borai khua chhungkaw pakhat thlawhhma a buh vui, tin 2 leh a chanve hmun chu sazu in zan khat thilthu-ah an eizo vek.

Zawnuam Borai YMA branch president Pu P.C. Lalhruaikima’n a sawi danin Pu Vanlalnggheta buh hmun bak hi hetiang sazu-in an khawih chhiat a la awm lova. Pu Vanlalnggheta te chhungkaw lo hi a bing a, an ri-ah lo nei dang an awm lova, Borai khua atanga km 6 vela hla a awm a ni. An thlawhhma velah sanghal no hruai an chhuak tih a hriat avangin September ni 10 khan Pu Vanlalnggheta hian an buh vui zan lama veng turin a naute pathum a tir a. Lo vengtute hian nghal rual ni lovin buh khawihtu ri sung sung an hria a, enge a nih pawh thim thamah an chian thei lova. A tuk lama a zuk endik chuan a buh hmun tin 2 leh a chanve vela zau chu sazu-in an seh zo vek tih a zu hmu ta

niin Pu Vanlalngheta chuan a sawi a. Thil thleng hi Zawlnuam BDO hnenah an hriattir nghal thu a sawi a ni.

Tun hnai atang khan rawthing a tam mek a, nakum khi Thingtam lo thlen leh hun tur ni-in helam zirmite chuan an sawi a, Thingtam hnuhnung ber chu kum 1977 kha a ni. Rawthing hi kum 48 dan zelah a tam thin a, mau leh rua a tam hian sazu a puang ziah niin upate chuan an sawi a. Sazu-in an thlawhhma a buh leh bal an seh zawh avangin tam a tla ta thin a ni. Nakuma Thingtam lo thleng turah pawh a 'sehsam' an tiha thil thleng thin thangnang kai chiam leh pangang puangte pawh hmun hrang hrangah a thleng tawh a ni.

Kum 2007-2008 Mautam lai a zir chiang tura Mizoram a lo kal Australian mi sazu chanchin zirmi Ken Aplin chuan sazu pa hian an ril a tamin a note an ei thin niin a sawi a, mau leh rua a tam chuan a rah kha duhtawka ei tur an hmuh avangin a note an ei lova, sazu hi nasa takin a pung a. Sazu tam lutuk chu mau leh raw rah ei tur awm tawh loh hnu-ah buh hmunah an tuan ta thin niin a sawi a ni.

<><><>

MALARIA

Kumin thla 8 kal ta chhung khan Mizoramah sikserh natna avangin mi 5 an thi tawh a, thite hi Lawngtlai district ami vek an ni. Health and Family Welfare hotute hnen atanga thudawn danin kumin January atanga August thla tawp thleng khan sikserh vei a rinhlelh mi nuai 2, sing 1, sang 5 leh 39 te thisen endik a ni a. Chuta tang chuan mi 14,634 te chu sikserh natna an kai tih hmuhchhuah a ni a. An zinga 5, Lawngtlai district ami vekin nunna an chan a ni. Sikserh vei hmuhchhuah zinga 7,858 hi Pf kan tih mai Plasmodium falciparum parasite kai an ni a, chu chu sikserh hri kai zawng zawng atanga za zela 53 point 70 an ni a, mi 6,776-te chuan Pv kan tih mai Plasmodium vivax an kai thung a ni. Aizawl district-ah sikserh hri kai inringhlel thisen endik a tam ber a, mi 63,458 thisen endik a ni a, mahse, sikserh natna vei hmuhchhuah chu mi 67 chauh an ni. Lawngtlai district chu sikserh vei leh vei lo thisen endik tamna ber dawttu a ni a, thisen 37,274 endik zinga 7,003 zet chuan sikserh an vei tih hmuhchhuah a ni a. Sikserh vei hmuhchhuah zinga a tam zawk, mi 4,165-te chuan Pf an vei a ni.

Sikserh vei leh vei lo hriatna atana thisen endik tam ber pathumna chu Lunglei district a ni a, mi 33,056 thisen an endik zinga mi 3,188 chuan sikserh an vei tih hmuhchhuah niin an zinga 2,027 te chu Pf vei an ni. Sikserh vei tamna thin tho Mamit district-ah chuan mi 18,692 thisen endik zinga 2,738-te chuan he hri hi an kai tih hmuhchhuah a ni a, Mamit-ah hian Pf aiin Pv vei an tawm zawk. Mizorama sikserh natna vei tamna district 3-te hi Bangladesh nena ramri intawm vek an ni. District lum berte zinga ngaih Kolasib-ah chuan sikserh vei leh vei lo thisen 12,027 lai endik a ni chungin a vei hmuhchhuah chu mi 13 chauh an ni a, an zinga pakhat chauhvin malaria Pf a vei a ni.

<><><>

CHURCH UNITY

Mizorama kohhran hrang hrang inpumkhat tura tan lakna chuan a vawrtawp thleng mekin kohhran 8-te chuan thla thar October ni 27 khian Council of Churches in Mizoram (CCM) din an tum thu an puang. Zirtawpni a Mizoram Baptist Kohhran hmunpui, Lunglei Serkawn a kohhran hrang hrang aiawh mi 41 thukhawmte chuan October ni 26-ah rorel inkhawm kovin a tuk October ni 27 (Pathianni)-ah Aizawl Mission Veng Presbyterian Kohhran biak-inah CCM din a nih tak thu puan ni se tiin thutlukna an siam a. Baptist kohhran general secretary leh CCM dinna atana committee secretary Rev. R. Lalbiakliana chuan kohhran inpumkhatna pawla executive committee member tur atana kohhran hrang hrangin an rawn thawkhawm 50 a nih tawh thu leh, kohhran hrang hrangin kum khat atana an thawh khawm sum ruahman lawk cheng nuai 27 a luh tawh thu a sawi a. CCM pisa atan hian Aizawl Mission Venga Synod Conference Centre chu hman a ni dawn a. Hnathawk tur lak chungchangte pawh Zirtawpni-ah chuan sawiho a ni. Tuna Council of Churches in Mizoram a tel tawhte chu Mizoram Presbyterian Kohhran, Mizoram Baptist Kohhran, Evangelical Church of Maraland (ECM), Liram Isua Krista Baptist Kohhran (LIKBK), Evangelical Free Church of India (EFCI), Isua Krista Kohhran (IKK), Wesley Methodist Church Mizoram (WMCM) leh Independent Church of India (ICI) te an ni.

<><><>

OIL SCARCITY

Kawng chhiat avangin Tuialhthei phur Tanker te kawng lakah an tangkhang nasa a, Aizawl leh hmun danga Filling Station-ah tuialhthei pek chhuah tur a tlem tawh hle.

All Mizoram Petroleum Dealers' Association (AMPEDA) hruaitute chuan tunah hian tuialhthei phur truck-te chu Kawnpui leh Khamrang inkar kawng chhiaah an tangkhang deuh vek niin an sawi a. Oil tanker pahnih/khat Aizawl thleng a awm leh zauh thin tih sawiin, hemi avang hian filling station tam zawkin petrol leh diesel hralh tur an nei mang tawh lo niin an sawi a; mipui mamawh phur lirthei tangkhang awm zel tur tiziaawm turin chak zawkin sorkarin hma a lak a tul hle ni a an ngaih thu an sawi a ni. Filling station neitu pakhat chuan petrol leh diesel hi tun lai hian Numaligarh atangin an la ber thin niin a sawi a. Khu lam chu kawng chhia awm ve tho mah se a zia-awm a, Kawnpui leh Khamrang inkar kawng chhe lutuk avang hian tuialhthei phurtute an tangkhang nasa a ni a ti a. An tuialhthei phurtu driver pakhat Inrinni a rawn dahtu phei chuan Mizoram an rawn luh atanga ni 8-na-ah Aizawl an rawn thleng thei chauh niin a sawi a ni.

<><><>

KEJRIWAL TO RESIGN

Delhi Chief Minister Arvind Kejriwal-a'n ni hnih hnuah Chief Minister a nihna atangin a bang dawn tih a sawi a, Chief Minister thar thlang turin ni reilote hnuah Aam Aadmi Party MLA-te an thukhawm ang tih a sawi bawk. Delhi-a an party office-a inkhawm buatsaihah Pu Kejriwal-a chuan Delhi assembly inthlanpui, nakum Feb thlaa neih tur chu Maharashtra rualin kumin Nov. thlaa neih a ngiat thu leh mipuiin thu tlukna an siam hma chuan Chief Minister thutnaah a thu dawn lo tih a sawi bawk. Delhi excise policy thubuaiah Pu Kejriwal-a hi Zirtawpni khan Supreme Court-in bail-in a chhuah tir a ni.

<><><>